

道教靈驗記序

宋徽宗御製

夫妙道本於混成至神彰於不測經語所以宣契象宮觀所以宅威靈符籙所以備真科齋祠所以達精懇驗微應之非一明勝贊之無差誠覺寤於蒼黔而彰亶於善惡也朕願惟寡昧獲纂隆平荷杜福之威臻務齊明而匪懈思揚妙理普示羣生因覽杜光庭所集道教靈驗記二十卷其事顯而要其旨實而詳今昔所聞盈編而有次殊尤之迹開卷以斯存真永流傳俾刊方版庶資訓範克暢淳風直敘歎由題於篇首云爾

杜光庭撰

道之為用也無言無為道之為體也有情有信無為則任物自化有信則應用隨機自化則冥乎至真隨機則彰乎五教經曰善者吾善之不善者吾亦善之德善此明太上渾其心而等觀赤子也書曰不獨親其親天下皆親不獨子其子天下皆子此明聖人體其道而慈育蒼生也惡不可肆善不可沮當賞罰

以評之經曰人之不善何棄之有故立天子置三公此聖人教民捨惡從善也又曰為惡於明顯者人得而誅之為惡於幽闇者鬼得而誅之又曰為善者善氣至為惡者惡氣至此太上垂懲勸之旨也書曰惟上帝不常作

善降之百祥作不善降之百殃此聖人法天道福善禍淫之戒也由是論之罪福報應猶響答影隨不差毫末豈獨道釋言其事哉抑儒術書之固亦久矣宣王之夢杜伯晉侯之夢大厲恭世子之非罪渾良夫之無辜化豕之報齊侯結草之酬魏氏良宵之殛駟帶鄭玄之梓劉蘭直筆不遺良史攸載足可以為罪福之鑒戒善惡之準繩者也況積善有餘福積惡有餘殃幽則有鬼神明則有刑憲斯亦勸善懲惡至矣大道不宰

太上好生固無責於芻狗而示其報應直以法宇像設有所主張真文靈科有所拱衛苟或侵侮必陷罪尤故歷代以來彰驗多矣成紀李齊之道門集靈驗記十卷始乎蘇懷楚玄門靈驗記十卷俱行於世今訪諸耆舊採之

見聞作道教靈驗記凡二十卷庶廣慎微之旨以弘崇善之階直而不文聊記其事